

GEORGE MUNISIPALITEIT: VERORDENING INSAKE STRAATHANDEL

Ingevolge die bepalings van artikel 156 van die Grondwet van die Republiek van Suid-Afrika, 1996, bepaal die George Munisipaliteit soos volg:-

Inhoudsopgawe

1. Woordomsrywings
2. Beginsels en doelwitte
3. Toepassing

HOOFSTUK 1: ALGEMENE BEPALINGS VAN TOEPASSING OP STRAATHANDEL

4. Beperkte en verbode gebiede
5. Plekke waar straathandel verbied word
6. Pligte van straathandelaars
7. Verbode gedrag
8. Verwydering en skut
9. Algemene goedere register
10. Wegdoening met geskutte goedere
11. Verkoop van geskutte goedere
12. Munisipale werknemers en raadslede mag nie geskutte goedere koop nie
13. Koerantverkopers

HOOFSTUK 2: ALGEMENE BEPALINGS

14. Boete
15. Verantwoordelikheid van persone wat straathandelaars in diens neem
16. Vrywaring
17. Appèl
18. Skakelforums binne die gemeenskap
19. Herroeping van verordeninge
20. Kort titel en inwerkingtreding

1. Woordomsrywings

(1) In hierdie verordening, behalwe as die sinsverband anders aandui, beteken-

“**Wet**” die Wet op Besighede 1991, (Wet 71 van 1991) en sluit dit die regulasies in wat ingevolge die Wet afgekondig is;

“**goedkeuring**” goedkeuring deur die munisipaliteit en het “goedkeur” ‘n ooreenstemmende betekenis;

“**tuin**” ‘n tuin waartoe die publiek die reg van toegang het;

“**goedere**” enige roerende saak en sluit dit enige lewende ding in;

“**kruising**” ‘n kruising soos omskryf in die regulasies, afgekondig ingevolge die Nasionale Parkeerswet, 1996 (Wet 93 van 1996);

“**rommelstrooiing**” enige voorwerp of goed wat deur ‘n persoon weggegooi word in enige plek behalwe ‘n goedgekeurde vullishouer wat vir daardie doel voorsien is, of by ‘n afvalstortingsterrein of prosesseringsterrein;

“**motorvoertuig**” ‘n motorvoertuig soos omskryf in artikel 1 van die Nasionale Padverkeerswet, 1996 (Wet 93 van 1996);

“**munisipaliteit**”-

- (a) Die George Munisipaliteit, en sluit dit enige politieke struktuur, politieke ampsdraer, raadslid, behoorlik gemagtigde agent daarvan of enige werknemer wat ingevolge hierdie verordening optree uit hoofde van ‘n mag wat in die munisipaliteit vestig en gedelegeer of gesubdelegeer is aan sodanige politieke struktuur, politieke ampsbekleer, raadslid, agent of werknemer, of
- (b) ‘n Diensverskaffer wat ‘n verantwoordelikheid nakom onder hierdie verordening, wat aan hom toegewys is ingevolge artikel 81(2) van die Plaaslike Regering: Munisipale Stelselwet, 2000 (Wet 32 van 2000), of enige ander wet soos die geval mag wees;
- “munisipale bestuurder”** ‘n persoon deur die munisipaliteit aangestel ingevolge artikel 82 van die Munisipale Strukturewet, 1998 en sluit dit enige persoon in:
- (a) wat waarneem in sodanige pos; en
- (b) aan wie die munisipale bestuurder enige mag, funksie of verantwoordelikheid gedelegeer het insoverre dit die uitvoering van daardie magte, funksies of verantwoordelikhede raak.
- “oorlas”** enige optrede, lating of toestand wat aanstootlik of gevaarlik is, of wat ‘n wesenlike invloed het op die gewone gerief, gemak, vrede of stilte van ander mense of wat die veiligheid van die publiek beïnvloed of mag beïnvloed;
- “ampelik”** ‘n aangewese beampte wat deur die munisipaliteit gemagtig is om enige of al die funksies en magte wat in hierdie verordening beoog word, te mag uitvoer of uitoefen;
- “park”** ‘n park waartoe die publiek die reg van toegang het;
- “bederfbare eetgoed”** bederfbare eetgoed wat as sodanig in die Bederfbare Eetgoed Regulasies, afgekondig onder Goewerment Kennisgewing R1183 in Staatskoerant 12497 van 1 Junie 1990 (soos gewysig) kragtens die Wet op Eetgoed, Skoonheids- en Ontsmettingsmiddels, 1972 (Wet 54 van 1972) en sluit vleis, melk, vis, viseiers, weekdiere, skaaldiere, vrugte, groente en brood in;
- “perseel”** sluit enige grond, gebou, struktuur, gedeelte van ‘n gebou of ‘n struktuur, of enige voertuig, vervoermiddel, vaartuig of vliegtuig in;
- “voorgeskryf”** voorgeskryf deur die munisipaliteit volgens ‘n besluit;
- “eiendom”** in verhouding tot ‘n straathandelaar, beteken goedere waarmee ‘n straathandelaar handel dryf, en sluit dit enige artikel, houer, voertuig of struktuur in wat gebruik word of wat beoog gebruik te word in verband met straathandel deur ‘n straathandelaar;
- “openbare geriewe”**-
- (a) enige grond, vierkant, kampeerterrrein, karavaanpark, strand, swembad, openbare oopruimte, openbare oord, ontspanningsterrein, rivier, dam, natuurreservaat, dieretuin, botaniese- of ander tuin, of wandelpad, insluitend enige gedeelte daarvan en enige gerief of apparaat daarin of daarop, wat die eiendom is van, of wat besit, beheer of gelewer word deur die munisipaliteit en waartoe die algemene publiek toegang het, hetsy deur betaling van toegangsgeld al dan nie, maar met uitsondering van ‘n openbare pad of – straat;
- (b) ‘n gebou, struktuur, saalvertrek of kantoor, insluitend enige gedeelte daarvan of enige gerief of apparaat daarin, wat die eiendom is van, of besit word, of benut, beheer of verhuur word deur die munisipaliteit en waartoe die algemene publiek toegang het, hetsy toegangsgelde betaal word al dan nie, en
- (c) ‘n openbare gerief beoog by paragraaf (a) en (b) indien dit wettiglik beheer en bestuur word ingevolge ‘n ooreenkoms tussen ‘n persoon en die munisipaliteit;
- “openbare pad”** enige pad, straat of deurgang of enige ander plek (hetsy ‘n deurgang al dan nie) wat algemeen deur die publiek of ‘n gedeelte daarvan gebruik word en waartoe die publiek of enige gedeelte daarvan ‘n reg van toegang het, insluitende –
- (a) die soom van enige sodanig pad, straat of deurgang;
- (b) enige brug, put of drif wat deur enige sodanige pad, straat of deurgang gekruis word; en
- (c) enige ander werk of voorwerp wat deel vorm van of verbind is met of behoort tot sodanige pad, straat of deurgang;

“**rypad**” ‘n rypad soos omskryf in artikel 1 van die Nasionale Padverkeerswet, 1996, (Wet 93 van 1996);

“**verkoop**” ook ruil, omruil, verhuur, uitstal, blootstel, aanbied of voorberei vir verkoop, berg met die doel om te verkoop, of ‘n diens verskaf teen vergoeding, en het “verkoping” of “uitverkoping” ‘n ooreenstemmende betekenis;

“**sypaadjie**” ‘n sypaadjie soos omskryf in artikel 1 van die Nasionale Padverkeerswet, 1996 (Wet 93 van 1996);

“**straatmeubels**” enige meublement deur die munisipaliteit op die straat aangebring vir publieke gebruik;

“**straathandelaar**” enige persoon wat sake doen, hetsy as prinsipaal, werknemer of agent, deur enige goedere te verkoop, verskaf of aan te bied of die verskaffing of aanbod om enige diens teen vergoeding te verskaf, op of van ‘n openbare pad of openbare plek in die munisipale gebied maar sluit ‘n koerantverkoper uit;

“**straathandel**” om as straathandelaar sake te doen;

“**soom**” ‘n soom soos omskryf in artikel 1 van die Nasionale Padverkeerswet, 1996 (Wet 93 van 1996), en enige woorde of uitdrukkings waaraan ‘n betekenis geheg is in die Wet op Besighede 1991, (Wet 71 van 1991) het ‘n ooreenstemmende betekenis in hierdie verordening.

(2) ‘n Enkele daad van verkoping of aanbieding of lewering van dienste op ‘n openbare pad of ‘n openbare gerief word as straathandel beskou.

(3) ‘n Verwysing na ‘n persoon wat as straathandelaar sake doen, sluit die werknemer van die persoon in.

2. Beginsels en doelwitte

(1) Die Munisipaliteit wat ingevolge artikel 6 A (1) (a) (i) van die Wet op Besighede, 1991 (Wet 71 van 1991) optree, en-

(a) insoverre dit die beginsels in die Wet en Grondwet uiteengesit raak;

(b) met inagneming van die inwoners se behoeftes om aktief aan die ekonomiese aktiwiteite deel te neem; en

(c) met inagneming van die behoefte om ‘n skoon, gesonde en veilige omgewing in stand te hou, voorsien in hierdie verordening meganismes, prosedures en reëls om straathandel te bestuur.

(2) In die ontwikkeling en bestuur van sy verpligtinge en in die toepassing van hierdie verordening, erken die munisipaliteit ook die infrastrukturele, sosiale en ekonomiese teenstrydighede en ongelykhede wat uit vorige plaaslike regering handelings voortvloei en sal daarna streef om sodanige teenstrydighede en ongelykhede te oorkom deur die nuwe doelwitte vir plaaslike regering soos bepaal in artikel 152 van die Grondwet, te ondersteun.

(3) In die toepassing en handhawing van hierdie verordening, mag die munisipaliteit die realiteit van die Eden Distriksgebied in ag neem, die verskillende gebruike, kulture, omstandighede, geografiese gebiede, soorte persele, vlakke van ontwikkeling en tradisies en mag die munisipaliteit gebruik maak van die idees in hierdie verordening voorsien, insluitend die toepassing van verskillende norme, standaarde en riglyne, die goedkeuring van vrystellings en die gebruik van skakelforums.

3. Toepassing

Hierdie verordening is van toepassing op alle persone wat in straathandel sake doen binne die regsgebied van die George Munisipaliteit.

HOOFSTUK 1: ALGEMENE BEPALINGS VAN TOEPASSING OP STRAATHANDEL

4. Beperkte en verbode gebiede

- (1) Die munisipaliteit mag, ingevolge artikel 6A(2)(a) van die Wet en onderhewig aan die bepalings van paragraaf (6) tot en met en insluitend (j), enige plek binne sy regsgebied as 'n gebied verklaar waarbinne straathandel beperk of verbode is.
- (2) Die munisipaliteit mag by openbare kennisgewing en deur 'n opgerigte teken sodanige areas aandui, en die kennisgewing en teken moet –
 - (a) die beperkings of verbod op straathandel;
 - (b) indien straathandel beperk word –
 - (i) die grense van die gebied of staanplek ter syde gestel vir beperkte straathandel;
 - (ii) die ure waartussen straathandel beperk of verbied word; en
 - (iii) die goedere of dienste in verband waarmee straathandel beperk of verbied word; en
 - (c) dat die gebied uitverhuur is of andersins toegewys is, aandui.
- (3) Die munisipaliteit mag die gebiede beoog by sub-artikel (1) verander, indien die behoeftes en omstandighede van inwoners en straathandelaars sodanige heroorweging vereis.
- (4) 'n Persoon wat as 'n straathandelaar sake doen, teenstrydig met 'n kennisgewing in sub-artikel (2), begaan 'n misdryf.

5. Plekke waar straathandel verbode is

- (1) Behalwe as die munisipaliteit dit toelaat ingevolge 'n ooreenkoms of by wyse van die vertoon van 'n teken, mag geen persoon as straathandelaar sake doen, binne enige van die volgende plekke nie:
 - (a) in 'n tuin of park waartoe die publiek die reg van toegang het; of
 - (b) 'n soom wat grens aan –
 - (i) 'n gebou wat behoort aan of slegs deur die Staat of die munisipaliteit beset word;
 - (ii) 'n kerk of ander plek van aanbidding; of
 - (iii) 'n gebou wat as openbare monument onder die Wet op Nasionale Erfenishulpbronne, 1999, verklaar is.
- (2) Geen persoon mag as 'n straathandelaar sake doen in enige van die volgende plekke nie:
 - (a) in 'n plek verklaar deur die munisipaliteit onder artikel 6A(2)(a) van die Wet, as 'n plek waarbinne straathandel verbode is;
 - (b) by 'n plek waar straathandel die gebruik van die sypaadjie deur voetgangers belemmer of inmeng met die vermoë van mense wat die sypaadjie gebruik om goedere wat agter 'n vertoonvenster uitgestal word, te besigtig of daardie goedere buite sig verberg;
 - (c) binne 5 meter van 'n kennisgewing soos omskryf in Regulasie 322 van die Nasionale Padverkeersregulasies afgekondig onder GK R225 in Staatskoerant 20963 van 17 Maart 2000, kragtens die Nasionale Padverkeerswet, 1996, (Wet 93 van 1996);
 - (d) op 'n plek waar straathandel –
 - (i) 'n brandkraan;
 - (ii) die ingang tot of uitgang van 'n gebou;
 - (iii) voertuig verkeer;

- (iv) toegang tot 'n voetgang, 'n parkeer- of oplaai-plek of enige ander gerief vir voertuig- of voetganger verkeer;
 - (v) toegang tot, of die gebruik van straatmeublement of enige ander gerief ontwerp vir gebruik deur die algemene publiek;
 - (vi) 'n padverkeersteken wat vertoon word ingevolge die Nasionale Padverkeerswet, 1996;
 - (vii) 'n merk, kennisgewing of teken vertoon of gemaak ingevolge hierdie verordening, versper;
 - (e) op daardie gedeelte van 'n openbare pad wat aan 'n gebou wat vir woondoeleindes gebruik word, grens, indien die eienaar of persoon in beheer of enige inwoner van die gebou beswaar maak daarteen;
 - (f) op 'n gedeelte van 'n sypaadjie of openbare gerief, teenstrydig met 'n kennisgewing of teken deur die munisipaliteit opgerig of vertoon, vir die doeleindes van hierdie verordening; of
 - (g) binne tien meter (10m) van die ingang van 'n finansiële instelling of elektroniese bank gerief.
- (3) 'n Persoon aan wie 'n gebied of staanplek verhuur of toegeken is onder paragraaf (c) van artikel 6A(3) van die Wet –
- (a) moet voldoen aan die bepalings van die huurkontrak van toekenning;
 - (b) moet in besit wees van skriftelike bewys dat die munisipaliteit die gebied of staanplek aan hom of haar toegeken het; en
 - (c) mag nie enige skriftelike bewys dat die munisipaliteit 'n gebied of staanplek aan hom toegeken het, oordra nie.
- (4) Geen persoon mag enige goedere of dienste, insluitend dienste van los werkers in of by 'n plek waar straathandel verbied word, koop of aanbied om dit te koop nie.
- (5) 'n Persoon wat 'n bepaling van hierdie artikel oortree, begaan 'n misdryf.

6. Pligte van 'n straathandelaar

- (1) 'n Straathandelaar moet –
- (a) wanneer hy of sy sake vir die dag afsluit, sy of haar eiendom verwyder, behalwe as dit gestoor word in 'n struktuur wat deur die munisipaliteit goedgekeur en toegelaat is, na 'n plek wat nie deel van 'n openbare pad of openbare gerief vorm nie;
 - (b) wanneer deur 'n beampte van 'n munisipaliteit versoek of deur 'n persoon wat gemagtig is om munisipale dienste te voorsien, sy of haar eiendom skuif ten einde die beampte of ander persoon toe te laat om enige werk in verband met 'n openbare pad, openbare gerief of diens, uit te voer;
 - (c) die gebied of staanplek deur hom of haar beset in 'n skoon en higiëniese toestand hou;
 - (d) toesien dat die gebied altyd vry van rommel is, en moet, wanneer hy of sy hul sake vir die dag afsluit, wegdoen met rommel wat uit sy of haar besigheid ontstaan het, in houe wat deur die munisipaliteit vir die publiek voorsien is;
 - (e) op versoek van 'n beampte van die munisipaliteit, sy of haar eiendom skuif ten einde die gebied waar hy of sy handel dryf, skoon te maak;
 - (f) ten opsigte van die grootte en ligging van die gebied of staanplek deur hom of haar beset, -
 - (i) toesien dat die gebied wat hy of sy gebruik, nie 6m² in grootte en nie 3 meter in lengte oorskry nie;

- (ii) toesien dat 'n ruimte van nie minder nie as 1,5 meter tussen die muur van die winkel (aangrensend aan waar hy of sy, sy of haar besigheid bedryf) en homself of haarself; en
 - (iii) 'n ruimte laat wat nie minder is as 0,5 meter van die randsteen van die ryvlak nie.
- (2) 'n Persoon wat 'n bepaling van sub-artikel (1) oortree, begaan 'n misdryf.

7. Verbode optrede

(1) 'n Straathandelaar –

- (a) mag nie slaap of oornag by die gebied waar hy of sy handel dryf nie, of by die gebied waar 'n ander straathandelaar handel dryf nie;
- (b) mag nie sy of haar eiendom so plaas of opstapel op so 'n wyse dat dit –
 - (i) 'n gevaar vir enige persoon of eiendom uitmaak nie; of
 - (ii) waarskynlik enige persoon kan beseer of skade aan enige eiendom veroorsaak nie;
- (c) mag nie rommel in 'n mangat, stormwater afvoerpyp of ander plek wat nie vir die wegdoen van rommel bedoel is, stort nie;
- (d) mag nie op 'n openbare pad, of openbare gerief of in 'n stormwater afvoerpyp, enige vet, olie of ghries wat in die uitvoering van sy of haar besigheid gebruik is, laat uitloop nie;
- (e) mag nie toelaat dat rook, gasse, geraas, reuke of ander stof wat uit sy of haar aktiwiteit voortspruit, 'n oorlas of besoedeling van enige aard, veroorsaak nie;
- (f) mag nie 'n struktuur oprig vir die doel van 'n skuiling nie, met uitsondering van 'n tydelike struktuur ten einde skuiling teen die weer te bied, in welke geval die skuiling aan die einde van die dag se sake verwyder moet word;
- (g) mag nie sy of haar eiendom op die oppervlakte van 'n openbare pad of openbare gerief plaas nie;
- (h) wat sy of haar sake vanuit 'n voertuig doen, mag nie die voertuig of sleepwa op so 'n manier parkeer dat voetganger- of voertuigverkeer versper word nie en moet toesien dat hy of sy aan die bepalings van die Nasionale Padverkeerswet, 1996, voldoen;
- (i) mag nie sy of haar ware of ander eiendom op of in 'n gebou uitstal sonder die toestemming van die eienaar, wettige inwoner of persoon in beheer van sodanige gebou of eiendom nie;
- (j) mag nie 'n voorwerp op enige wyse aan 'n gebou, struktuur, sypaadjie, boom, parkeermeter, lamp, paal, elektriese paal, telefoonhokkie, posbus, verkeersteken, bank of enige ander straatmeublement in of op 'n openbare pad of openbare gerief heg nie;
- (k) mag nie sy of haar sake op so 'n wyse bedryf dat dit –
 - (i) 'n oorlas skep ;
 - (ii) die oppervlakte van 'n openbare pad of openbare gerief of openbare of private eiendom beskadig of ontsier nie; of
 - (iii) 'n gevaar vir verkeer veroorsaak nie;
- (l) mag nie 'n oop vuur wat 'n gesondheids- of omgewingsgevaar vir enige persoon of eiendom of vir straatmeublement inhou, maak nie;
- (m) mag nie, anders as in 'n vullishouer goedgekeur en voorsien deur die munisipaliteit, enige rommel op –
 - (i) enige grond of perseel
 - (ii) enige openbare pad of openbare gerief; of
 - (iii) enige openbare of privaat eiendom, versamel, stort, berg of deponeer nie;

- (n) mag nie sy of haar eiendom in 'n mangat, stormwater afvoerpyp, openbare toilet, bushalte, op die midiaan tussen verkeersbane of in 'n boom, bêre nie; en
 - (o) mag nie sodanige besigheid bedryf in 'n plek of gebied teenstrydig met enige verbod of beperking wat deur die munisipaliteit ingevolge artikel 6A(2)(a) van die Wet, goedgekeur is nie;
 - (p) mag nie handel dryf voor 'n formele besigheid met goedere wat soortgelyk is aan goedere wat deur sodanige formele handelaar te koop aangebied word nie;
 - (q) mag nie kinders onder die ouderdom van sestien toelaat om hom of haar te vergesel of namens hom of haar handel te dryf, waar langs 'n openbare pad handel gedryf word nie;
 - (r) mag nie van deur-tot-deur in enige sakesentrum soos in die munisipale soneringskema aangedui, handel dryf nie; en
 - (s) mag nie 'n oorlas veroorsaak deur aan te dring, te bedel of mense te intimideer om goedere te koop nie.
- (2) 'n Persoon wat 'n bepaling van sub-artikel (1) oortree, begaan 'n misdryf.

8. Verwydering en skut

- (1) 'n Beampte wat 'n redelike vermoede het dat eiendom gebruik word of beoog word vir die gebruik in, of in verband met, straathandel, hetsy die eiendom in besit is of onder beheer is van enige persoon al dan nie, onderhewig aan sub-artikel (2), mag die eiendom wat hy of sy vind by 'n plek waar straathandel beperk of verbied word, en wat 'n oortreding van enige sodanige beperking of verbod verteenwoordig, verwyder of skut.
- (2) 'n Beampte wat onder sub-artikel (1) optree moet, behalwe in die geval van goedere wat gelaat of agtergelaat is, 'n kwitansie aan die straathandelaar uitreik vir die eiendom wat op daardie wyse verwyder of geskut is en die kwitansie moet die volgende besonderhede bevat:
- (a) die adres waar en die tydperk waarvoor die geskutte eiendom gehou sal word;
 - (b) die voorwaardes vir die aflossing van die geskutte goedere; en
 - (c) dat onopgeëiste eiendom by wyse van 'n openbare veiling verkoop sal word.
- (3) Indien enige geskutte eiendom verbind is tot onroerende goed of 'n struktuur, en die geskutte eiendom is skynbaar onder beheer van 'n persoon wat by die plek teenwoordig is, mag 'n beampte die persoon beveel om die geskutte eiendom te verwyder.
- (4) Wanneer 'n persoon versuim om te voldoen aan 'n bevel om geskutte eiendom te verwyder, mag 'n beampte sodanige stappe doen as wat nodig mag wees ten einde die geskutte eiendom te verwyder.
- (5) 'n Persoon wat 'n beampte in die uitvoering van sy of haar pligte onder hierdie artikel verhinder of belemmer, of wat weier of versuim om die voorwerp op bevel van 'n beampte te verwyder, begaan 'n misdryf.

9. Beslagleggingsregister

Die munisipaliteit moet –

- (1) 'n register byhou wat die inligting, beoog by Skedule 1, bevat en wat te alle redelike tye vir publieke insae beskikbaar moet wees; en
- (2) die beslagleggingsregister onmiddellik voltooi, met die aanvaarding van goedere by die plek van veiligheid of berging, wat vir hierdie doel daargestel is.

10. Wegdoening met geskutte goedere

- (1) Enige bederfbare eetware wat ingevolge artikel 8(1) verwyder en geskut is mag, onderhewig aan sub-artikel (2) verkoop of vernietig word of op 'n ander wyse mee weggedoen word kragtens enige beleid van die munisipaliteit binne 'n redelike tydperk nadat dit geskut is,

met dien verstande dat die eiendom op enige stadium voor wegdoening daarvan, aan die eenaar terugbesorg kan word, op versoek van en by voorlegging van bewys van eenaarskap deur die eenaar aan die munisipaliteit.

(2) Die munisipaliteit is geregtig daarop om enige bederfbare eetware wat deur die eenaar daarvan opgeëis word, te hou of daarmee weg te doen totdat alle redelike uitgawes deur hom aangegaan en boetes deur hom uitgereik, betaal is.

(3) Die eenaar van enige goedere uitgesonderd bederfbare eetware wat alreeds deur die munisipaliteit hanteer is ingevolge sub-artikel (1) en (2), wat dit wil terugeis moet, binne 'n tydperk van 14 dae vanaf datum dat dit geskut is, by die munisipaliteit aansoek doen en moet die kwitansie beoog by artikel 8(2)(a) toon, by versuim waarvan die goedere verkoop mag word, onderhewig aan artikel 11.

(4) In die geval dat die opbrengs van enige verkoping van goedere beoog onder hierdie artikel nie voldoende is om die uitgawes deur die munisipaliteit aangegaan te dek nie, sal die eenaar daarvan steeds, ingevolge artikel 8(3)(a), verantwoordelik wees vir die balans.

11. Verkoop van geskutte goedere

(1) Indien die eenaar van geskutte goedere, met uitsondering van bederfbare eetware, versuim om sodanige goedere op te eis, en die voorgeskrewe gelde soos deur die munisipaliteit van tyd tot tyd bepaal, te betaal, moet die munisipaliteit binne 14 dae van die skut van goedere –

- (a) by die hof aansoek doen vir magtiging om die goedere te verkoop; en
- (b) in die aansoek beoog by paragraaf (a), die Hof voorsien van bewyse dat 'n verklaring beoog by sub-artikel (2) deur die eenaar ingedien is.

(2) Die verklaring beoog by sub-artikel (1)(b) moet die gelde en kostes wat verskuldig is ingevolge hierdie verordening, insluit.

(3) Die Hof moet, ongeag of die bedrae in die verklaring beoog by sub-artikel (1)(b) betwis word of nie –

- (a) summier die saak ondersoek;
- (b) vasstel of die eenaar van goedere in kennis gestel is deur die munisipaliteit; en
- (c) sodanige bevel maak wat dit as reg en haalbaar beskou, insluitend 'n bevel –
 - (i) ten opsigte van koste; en
 - (ii) rakende die proses wat die munisipaliteit moet volg ten opsigte van die verkoping van goedere waarop beslag gelê is.

12. Munisipale werknemers en raadslede mag nie geskutte goedere koop nie

Werknemers en raadslede van die munisipaliteit, of 'n familielid, of nabye verbintenis van enige munisipale werknemer of raadslid, mag nie enige goedere wat te koop aangebied word kragtens hierdie verordening, hetsy persoonlik of deur enige ander persoon, direk of indirek, koop nie.

13. Koerantverkopers

(1) Enige uitgewer van 'n koerant wat sodanige koerant deur verkopers in of op 'n pad verkoop, moet 'n ooreenkoms met die munisipaliteit sluit ten opsigte van die gebiede waar en tye waartydens sodanige verkope onderneem mag word.

(2) Die munisipaliteit mag die ure bepaal waartydens die verkoop van koerante ingevolge sub-artikel (1) onderneem mag word.

(3) Die munisipaliteit mag 'n tarief hef vir die verkoop van koerante in of op 'n pad binne sy regsgebied.

(4) Enige uitgewer of verkoper wat die bepalings van hierdie artikel oortree, begaan 'n misdryf.

HOOFTUK 2: ALLERLEI BEPALINGS

14. Boete

'n Persoon wat 'n misdryf ingevolge hierdie verordening begaan het, stel by skuldigbevinding, en onderhewig aan boetes voorgeskryf in enige ander wet, hom of haarself bloot aan 'n boete of by versuim om te betaal, tot tronkstraf, of tot sodanige tronkstraf sonder die opsie van 'n boete, of tot beide sodanige boete en sodanige tronkstraf, en in die geval van 'n daaropvolgende of voortgesette oortreding, tot 'n boete vir elke dag wat sodanige oortreding voortduur, of by versuim van betaling daarvan, tot tronkstraf.

15. Verantwoordelikheid van persone wat straathandelaars in diens neem

Wanneer 'n werknemer van 'n persoon 'n daad uitvoer wat strydig is met die bepalings van hierdie verordening, word die werkgewer self geag die oortreding te begaan het, tensy hy of sy kan bewys dat –

- (a) hy of sy nie sodanige daad toegelaat het nie;
- (b) hy of sy alle redelike stappe gedoen het om die uitvoering van die daad te voorkom; en
- (c) dit nie binne die bestek van die magtiging of die beloop van die werknemer se aanstelling was om 'n daad uit te voer wat strydig met hierdie verordening is nie.

16. Vrywaring

Die munisipaliteit sal nie aanspreeklik wees vir enige verlies of skade gely as gevolg van die skut van enige goedere ingevolge hierdie verordening nie.

17. Appèl

'n Persoon wie se regte beïnvloed word deur 'n besluit van die munisipaliteit mag teen so 'n besluit appelleer deur skriftelik kennis te gee van die appèl en die redes daarvoor ingevolge artikel 62 van die Plaaslike Regering: Munisipale Stelselwet, 2000 (Wet 32 van 2000) aan die munisipale bestuurder binne 21 dae vanaf datum van kennisgewing van die besluit.

18. Skakelforums binne die gemeenskap

(1) Die munisipaliteit mag een of meer skakelforums binne 'n gemeenskap vestig vir die doeleindes van –

- (a) die skepping van omstandighede vir 'n plaaslike gemeenskap om deel te neem aan die sake van die munisipaliteit; en
 - (b) bevordering van ekonomiese welvaart.
- (2) 'n Skakelforum mag bestaan uit –
- (a) 'n lid of lede van 'n belangegroep, of geaffekteerde persoon;
 - (b) 'n lid of lede van 'n wykskomitee in wie se onmiddellike gebied straathandel plaasvind;
 - (c) 'n aangewese beampte of beamptes van die munisipaliteit; en
 - (d) 'n raadslid.
- (3) (a) Die munisipaliteit mag, wanneer 'n aansoek vir goedkeuring, of 'n sertifikaat om vrystelling ingevolge hierdie verordening, oorweeg word, die insette van 'n skakelforum versoek.

- (b) 'n Skakelforum of enige persoon of persone beoog by sub-artikel (2) mag, op eie inisiatief insette aan die munisipaliteit voorlê vir oorweging.

19. Herroeping van Verordeninge

Die bepalings van enige verordening wat voorheen deur die munisipaliteit of enige ontbinde munisipaliteite wat nou by hierdie munisipaliteit ingelyf, afgekondig is, word hiermee herroep vir soverre dit verband hou met sake in hierdie Verordeninge voorsien.

20. Kort title en inwerkingtreding

Hierdie verordening staan bekend as die George Munisipaliteit Verordening insake Straathandel en tree in werking op die datum van afkondiging daarvan in die Provinsiale Koerant.

SKEDULE 1
Beslagleggingsregister Inligting
(Artikel 9)

‘n Beslagleggingsregister moet ten minste die volgende inligting bevat-

1. Plek waar goedere gehou word
2. Datum van ontvangs van goedere
3. Getal en beskrywing van goedere
4. Naam en adres van persoon wat op goedere beslag gelê het
5. Naam en adres van eienaar van goedere
6. Naam en adres of beskrywing van plek waar goedere gevind is
7. Afstand tussen plek waar goedere op beslag gelê is en die skut
8. Datum van verkoping van goedere
9. Opbrengs van verkoopte goedere
10. Naam en adres van koper
11. Oorskot bedrag (indien enige) aan die eienaar of munisipaliteit betaal
12. Kwitansie nommer